

楊園先生全集卷之一

門人吳江姚 璉原輯

後學興國萬斛泉編次

騷

有所思四首

若有人兮山之幽欲往從之兮阻且修吁嗟風雨憔悴兮

曷云其修

若有人兮水之洲欲往從之兮沔悠悠吁嗟江漢則宗兮

曷云其悠

若有人兮道之周延佇獨望兮誰適與謀吁嗟一日相見

兮其樂夷猶

若有人兮皇之州鳴佩將將兮君子好逑吁嗟願言則駕兮以遨以遊

擬招五首

顏子士鳳今時賢士也予與之交易十三寒暑無幾微閒忽然云亡予悲不能已又悲士鳳之抱志以終不獲見於世也爲詞招之招曰

魂乎歸來兮白日未莫兮壯志安酬何丈夫之生世而忽焉其休

魂乎歸來兮舉世行僞兮君心則憂何頑眾之未革而浩乎遠遊

魂乎歸來兮詩書盈積兮纂述焉周何主人之不見而遺此空樓

魂乎歸來兮窮交一志兮爾汝其猶何中道之相失而忍予無儔

魂乎歸來兮老者泣望兮幼復悲求何畏畏之靡立而能此春秋

五噫

過顏氏廢墟

繁華往日兮噫蓬草參差兮噫厲階誰作兮噫外侮其殷

兮噫孝睦貽謀兮噫顏氏蕭壻禍作而廢故云

詩

烏夜啼二首

烏夜啼子母一枝栖子母一枝栖如何夜夜啼

烏夜啼母將去子子獨栖母將去子子獨栖朝來還復啼

同遊不同意

鴻鵠舉四海雁鴛爭稻梁豈不號同羣所願非一方

浩歌

止君坐歎聽我浩歌天地則久古人無多日賢與聖孔子

孟軻寥寥百世疇與鳴和聞有作者彷彿四科我生其後

願言則那方袍申申修冠峩峩仰視日月俯觀山河思昔

先王伐柯伐柯我之哀矣則維其何普天之下宋朝祝鮀

巧笑不恥猶舞僂僂一旦中國汎如洪波爰駕二螭驅彼

鼉鼉東臨滄海西出滹沱匹夫歡樂遊子安坡與君高揖

偃息山阿振手狂樂不知其他

重九日

客邀予此日相與躡邱阿辭之得幽獨浩然撫絃歌三山

五老豈不悅何必勞勞事登陟聳身上與秋陽齊泰華崧

嶽皆崦嵫

赴玉午試抱關問稅作以諷之

席珍隆如■待價傲連城獨特皇仁大津關無稅名

市柏

邑市喧稠有柏森立過而感之

先生挺孤貞託根乃伊邇書見千夫勞夜聞羣柝止風雨
滌其煩星霜固其趾亭如長自芳罔識歲終始應有鬼物
依枝柯不能毀將古大隱流日日處塵市原校先生疑當作柏生

野步

芳草紛紜藉麥苗餘紅閒雜柳枝條漁舟半出犀溪右板
擊聲聲過野橋犀溪子家北

有感偶成

君不見南山有鳥名雉雞雨不求食愁沾泥北山有鳥名
鴟鴞嗜欲已極鳴中宵一朝相見愛其羽藏匿形容學鸚
鵡更令二雛與之遊遂託知交在肺腑鴟將遠行攬木螂
反從饑雉聚餽糧雉饑念鴟報乾樵慙一飛沉滄浪滄
浪之水流不息行人顧之為悲傷鴟歸來飽且逸不復
咨嗟弔其恤坐看子母零雨風啄粟靡從啼日月迺有歲
蕤腐鼠羣猶助鴟鴞取子術雉之孤子鳴哀哀寧取我身
無毀室嗚呼之子勿怨鴟努力高巖豐羽毛君不見雙翼
既垂尾旋薄王孫橫怨關烏號

無題

舉世笑尾生尾生寧易得身輕然諾重一言不可食食言
雖或肥守身務繩墨壘畝猶有疆布帛亦有幅云胡覲斯
人二三其爲德永懷古之人勛哉

母諱四首

嬰兒失其母中夜號不止云胡更二毛食息猶如此
精力未宜衰劬勞爲二稔父賫志百端繼述何子
凡母之訓言兒未能遵者不忘以終身子孫世傳寫
茹荼十三年菽水無一日日往不可追悔恨總無及

和程巽隱先生惜日短詩

有序

玄風其激萬樹號摧哀庾老之江頭感楚臣之歸

遠文學六七酌酒告予乃引觴而歌曰鴻雁兮孤
飛鬱長雲兮晝無暉懷佳人兮迷望憶往日兮芳
菲又爲之歌曰雨雪兮霏霏流舟兮何依天若垂
兮將問怨閨闔兮凝扉於是聞者各有歎也爰舉
昔日之日續西溪之遊率爾成詠唱和遂繁嗟乎
梧棲雖謝井邑未空倘有後賢先生其可作也奚
懼風流欲歇寂寥三百年乎車馬贈齋緬斯賦詠
考夫張履祥序

木葉改榮落相將又一年所業未殊昔徒爲悲逝川初謂
不復爾漸至乃依然聞道果何日詩書自簡編春秋三十

六不久成華顛攬衣起徘徊明發期先鞭

千古英雄血無非泣盛年狂瀾奔極海百憂障東川道遠
馬無力撫劔心惕然往昔亦人爾日星炳遺編我獨何爲
者愁長欲素顛夷吾事業微猶思爲執鞭

歲月向無邁吾嘗亦少年臨風隨茂樹觀水立晴川自罹
憂患後百情已冷然閉門誰與俱求友惟青編其人皆不
死招我泰山顛所期日未暮不在黃金鞭

天地自開闢不知今幾年人生暫一過滔如汎百川日夜
去不息古今且暮然萬物歸何所名跡遺陳編前者骨未
朽後已白在顛何心名利場駕馬復揚鞭

附程原韻 并序

歲十二月二日同諸友訪環中老鮑恂於西溪
隱居蒙畱歎談論歡洽豈無一言以紀之遂命
題云各賦一首嗟夫在心爲志發言爲詩觀其
所作蓋可見矣

我志在千古此生無百年百年亦苦短白日如奔川光
陰旦復旦把鏡心茫然歷看古賢傑勳業昭簡編安能
不努力坐待雪滿顛羲和駕六龍爲我遲遲鞭

歎馬二絕贈趙公簡

海內無爭戰芳郊騁薄蹄何顏隨朔產昂首學長嘶

豈有千里心所戚惟窮老屢鞭腹自饑躑躅悲荒草

丙戌秋友人自越來公簡寓書曰惟陶徑管席可以自
安予拜而志之不敢稍忘蓋懼三徑之蕪為賢友割席

也今忽三載公簡將遠行因錄贈行適姚子大也至言

及言遠書益為之感言遠時將至廣州任與大也書曰

意當在割席之列不敢通
考夫尊師辱在盟好今不才濫節
候見時希為致問故云

上達詩

一從絕頂望雲霄一墮窮巖歎寂寥今日相悲何太遠不
知分手在山腰

廣居詩

進趨二帝三王後揖讓周公孔子前亞聖大賢皆左右相
觀復姤與坤乾

會祝孝廉葬阻雪二首

一邱封作孝廉墓風物千秋懷古情多媿故人貧病迫馳

驅冰雪獨陳兄

時子以無舟遲行二日仲木臥病激湖
發引時惟乾初父子上下山坂十餘里

師門問學吾徒共七尺全歸志獨深猶憶姑蘇終夜雪相

期不屈季通心

先師書云世人以七尺為性命吾人以性
命為七尺孝廉志之崇禎癸未孝廉被

逮于送之吳
門時亦大雪

旅歎二首

終年旅處義何如假託陶公乞食詩自訟朝來無一事那

堪燕息任蜚蜚

三復陶公乞食詩寸心豈有暫寧時
勤勤冥報誠何意坐令韶光空自馳

宿山中

明月不改色青山留舊顏故人零落盡臥聽水潺潺

閏七月七日

時賢巧已多變化窮鬼物猶病術未工一秋而再乞子獨
抱拙遊違眾應來艱緘舌戒觸藩服疇遠施尉拙學不自
嫌甘心在長屈屈伸靡定門守之彌矻矻

題王介甫詩後

介甫詩曰周公恐懼流言日王莽謙恭下士時假

使二公身早死一生一作此中真偽有誰知

周公自有周公志王莽終懷王莽情勿謂隱微人不見千

秋公論日星明

惜往日

平生心志用何方齒落顛華日夜傷一息尙綿知覺在不

難傾否力為臧

思將傾否力為臧檢點平生益自傷端為有知皆害義納

之規矩莫非狂

此心非果欲為狂信謂維皇授我良讀罷遺經旋內省始

知厥疾中膏肓

嘗為良知之學十年故云

既驚厥疾在膏肓尙自徘徊歧路傍非為舊牽陰護惜却

因箠豆未能忘

先後為舉業之師十年

箠豆雖云未易忘命為之制義為防壯年舉足成迂謬逝

者如斯已弗遑

感逝于今固弗遑不聞懿戒耄猶強修身以俟儒家訓得

正何須計短長

長年敗德孰如殤惴惴應猶過獨梁大道四通皆砥矢驅

車郊野睹康莊

康莊之道古今同還問曾施克復功克己未難難復禮周

行不遠未能從

感遇二首

自昔墾礪田力疲鮮所獲今茲受草萊朝暮不遑適反覆

已四三根盤匪易闢筋骨豈嘗愛鎡基未之惜嘉種無新

機莠勢轉充斥自分農家流服勤乃長策水旱會有時螫

賊數庸冗惟願菑畬成主伯蒙其益亦令繼自今動免怨

疆場敢希樂郊人歲取禾三百

長途望不極白日亟西馳敝車駕羸馬僕夫力已疲故人

意欵曲執手語移時壺飧陳道左復申以多儀多儀自古

重壺飧奚獨私饑渴非不慰所憂道逶迤暝色接衣袂惘

惘其安之終焉悔靡及云何久躊躇

贈屠子

屠子昏禮成衣冠見師傅肅儀趨席端徐述嚴君諭氣下
色已怡旋折無矜步兄弟相後先翩然美無度世教日陵
夷相鼠羣諱惡斯風久已微君家獨守故過庭聞幼儀讀
書賤文賦義訓唯弓裘虔戒乃馳驚重君恭敬心而辭其
禮數拜指非具文將以達情慄病餘苦筋力朴野遂成痼
受施報必時或恐至遲暮亦恥艾渺聞閑家失於素何以
答君心周南正始句

偶占

風雨兼旬塞獲箭一編靜對日黃虞興來適爾覘晴色水
滿前川花滿區

聞禽

寒光已逗人慵起雞聲未已鳥聲催凡物有知皆樂且因
思百蟄候行雷

卜居

覆載何寬慮買鄰斯人猶是古之民反躬靡玷羣知敬力
學敦和神所珍

遇災二首

長虛貯粟亦何憂滿目饑窮幾有秋力穡不逢天匪虐懲

今疆畝備應周

小麥猶青大麥枯情均水火望來蘇蒼天解得生民意交
夏晴煦風雨無

故居二首

真居同是古先民豈曰人情忽變今大德有容平物我天
涯皆可睦爲鄰
天涯猶可睦爲鄰何況生初日與親責已責人輕重處失
終由己匪由人

酬友人二首

二十年前謀拙學應憐頭白得其門途長日暮將焉屆猶

願知交共講論

關中大禮昭天地洛閩遺書一曜存無忝所生今日事紛
紛同異後人論

附原詩

三十年來兄弟好於今能得幾人存相逢雨雪寒城夜
白髮燈前仔細論
傷離歎逝無須爾喜極君能爲道存且盡燈前杯酒意
他時同異再深論

又附何商隱擬酬二首

拙學沾沾幸得門艱危不意此身存大冬嚴雪今何夕

白首相知喜共論

閩洛分明沂委源
羹牆千古此心存
後人自是多同異
我輩還期勿重論

偶占

中天星月正輝輝
忽苦陰雲障四隅
猶藉疾風盪捲力
庭光徹映書幃

漁父

昨夜絲綸有未收
鄰翁篝火放漁舟
曉風非不寒侵骨
自昔勞勞到白頭

答友人見規四首

邱子季心屢以未有講學輔仁之益來責書此答之

爰追往事都成悔
懸揣方來無盡憂
力學不堪悲老大
躬行未有一能修

學之不講是吾憂
若涉津涯何處求
惟有返躬知履錯
敢騰口說起恒羞

朋友之交道若何
相觀而善益爲多
韋茲自是終身事
藥石焉知不長疴

作聖作狂方寸取
爲真爲僞夢魂知
悠悠世論何心顧
祇痛簷光一瞬移

謝友

七月戊申同錢雲士問醫語溪三日風雨疾載作
方苦支離朱回津投子竹杖賦以謝之

本以求醫往新疴未藥生扶顛仁者意懷惠小人情

凡物何珍異珍其利體膚逾年衰轉迫藜杖弗堪扶去秋

爲子製藜杖私謂十年可以
相依不意遽衰便須謝去

竹馬童年事依稀昨日情兒癡憂未識尙慮竊之行

少壯逢山水攀虛類鳥棲只今平地踏時抱履冰虞

夏五苦溢聞沈德甫訃

積雨沉陰越再旬維皇豈果厭斯人忽傳野老投函語痛

惜橫流亦久淪

靈雨初霽得顧貞女傳

睡覺天光已向晨維皇固自愛蒸民讀終貞女捐生卷幽

閣偏能顧大倫

有感

歎息吾衰道不聞庶幾共學與斯文云胡否塞同天地參

貳東西各喪羣

同趙二阻雪宿邵家灣邱老家己酉閏十
二月下同

攜琴擬向萬蒼中流水高山四座同豈爲丈人將止宿故

施冰霰夾西風

斗酒難將壯志酬談兵說劍不能休漁樵莫及興亡事故
李將軍竟白頭

同趙二入山訪何商隱王寅旭呂

庚戌

乾坤寥廓有吾徒猶幸於今道未孤風撼萬松濤並海雨
傾眾壑瀑奔湖躋登原校一作攀心急衰如健拄礙行徐顛得

扶原校一作拄杖能扶路不嘔為問三餘功幾許星回庶物尚新圖

酬徐堅石

落窶誠吾分饑年藉館餐玩心惟古訓盈耳亦先傳霜白
秋方凜花殷春復殘願言弘道力無令著書繁

附原詩

張公何落窶陳叟大摧殘痼疾仗兒僕窮愁耐館餐春

山當戶靜秋月到庭寒衰老稀新著周流憶舊歡陳叟蓋乾

初也久疾不愈

王子仲秋許大辛過半邏候予不至留詩一章末有

閔農之句述此以答之

閔農初望雨插植苦不前植之未成苗飛蝗忽至焉趨趨
蠖既出憂心殆已煎八月霖雨作溝渠成巨川車戽兼晨
夜伊誰敢息肩所冀雨滅蝗庶幾小有年重經水旱後殘
喘或得延豈知禍尤篤降此蟲萬千集根苗遂槁集榦穗
失鮮初猶十二三漸乃靡一全彌望皆朽折西陌接東阡

蒼天誠何意斯民日顛連仁愛寧異古必也民多愆我友其敬矣三復有皇篇

觀物偶占三十九首

閒居觀物理理在是為天淑慝微分際端為禍福先
 閒居觀物理理本是天然為馬首須絡為牛鼻乃穿
 閒居觀物理理可默無言浩浩江河逝昭昭日月懸
 閒居觀物理物執重難勝輕重權靡失天之理即徵
 閒居觀物理得失豈爭多何以怨尤泯人疴作我疴
 閒居觀物理感物物隨通將達天涯問銀燈早結紅
 閒居觀物理理得是閒居苦樂語巢燕逸勞穿藻魚

閒居觀物理物以嗜為馨雙蝶隨芳舞羣蟻自逐腥

閒居觀物理何物恃成形蜣以穴而化腐者乃為螢

閒居觀物理物味正宜探不厭酸辛苦如何便得甘

閒居觀物理試向樹頭看取新先去故華約子斯繁

閒居觀物理理顯一庭中雨露均天地榮衰自不同

閒居觀物理物見其情蜂隨原校一作從蜂侶過蟻逐眾蟻

行

閒居觀物理理即紙窗形一隙微通處乘除已不停

閒居觀物理無不燦然呈花發蜂隨至雲開鳥弄聲

閒居觀物理有物理分明勺泉蟲遂產撮土草隨生

閒居觀物理果實見天心剝窮還向本自古至於今
閒居觀物理有物苦塵封朝來會拂盡未幾已重重
閒居觀物理物只定於初發軔迷周道徒勞將大車
閒居觀物理理只砥如平谿谷窮攀躋何如周道行
閒居觀物理理以物而形流峙觀山海昭回觀日星
閒居觀物理何物不相求好鳥鳴高樹新蘿結小樓
閒居觀物理萬理本天然試問寒梅發幽香孰與傳
閒居觀物理置物物之宜特達誠非過充庭豈有私
閒居觀物理物物愛天光廡下纖微草萌芽已向陽
閒居觀物理百穀隱於泥葆此凝寒節春風綠滿畦

閒居觀物理理在返諸身物物求斯得誰非橫目民
閒居觀物理生理自存存非以仁嗣續根苗長子孫
閒居觀物理物以大爲君大小勢相倚安危理不分
閒居觀物理物智日相高曷若循恒理爲能省百勞
閒居觀物理節物至幽居百卉芳猶競櫻桃薦已餘
閒居觀物理萬物一乘除天地初何意榮衰會有時
閒居觀物理物物位難移東物將西置西東兩失宜
閒居觀物理物物勢如奔愛惡相攻取從明直達昏
閒居觀物理理亦豈難觀飲食因饑渴裘絺爲煥寒
閒居觀物理妙理盡於閒谷邃涓泉出雲行亦白山

閒居觀物理物理自平平春先百舌語秋至草蟲鳴
閒居觀物理理罔閒斯須物物相消長凝眸已密移
閒居觀物理體物理無遺纖人豪芒際其宏及二儀

丙戌吟 改本

欲求端本窮源事盡在雞鳴而起時一念離真卽爲妄此
中得失寸心知

雍熙景象非難致端在冰淵不已時試驗空山最深處一
陽方動物先知

偶占二首

大塊生人豈有心氤氳 卽爲身東西南北同天覆何

事拘拘問里仁

仁里誠宜託此身於今幾見里之仁嘗聞四海皆兄弟平
恕要惟責此心

鷓旦不鳴二首

至陰閉重關長夜何時止陽回應有時守默宜可俟
寒暑運羣物動息各有攸風雨晦之夕雞鳴不自休

楊園先生全集卷之一終